

Headlines

1. संसद दे दौनें सदनं दी कार्रवाई विरोधी पार्टिं आसेआ कीते गेदे शोर-शराबे करी कल्लै तगर स्थगित।
2. प्रधानमंत्री नरेंद्र मोदी होरें कांग्रेस पर पलटवार करदे होई डॉ. अम्बेडकर हुंदा अपमान करने दे इतिहास गी उजागर कीता ते उनें अम्बेडकर हुंदी विरासत गी बनाई रक्खने आस्तै उंदी सरकार दी बचनबद्धता दोहराई।
3. कठुआ च अगग लगने आहली घटना च 6 लोकें दी मौत, केंद्री मंत्री जितेंद्र सिंह ते उपराज्यपाल मनोज सिन्हा होरें इस घटना पर दुख ते बसोस प्रगट कीता।
4. किश्तवाड़ च Autumn Fest ते कवि सम्मेलन कल्लै थ्वां शुरू होग।
5. जम्मू-कश्मीर च सीत लहर जारी, 20 दिसंबर तगर मौसम खुशक रौहने दा अनुमान।

<><><><><><>

Parliament

संसद च अज्ज केंद्री गृह मंत्री अमित शाह हुंदी डॉ. बी.आर अम्बेडकर उप्पर कीती गेदी टिप्पणी उप्पर शोर-शराब होआ जेदे चलदे संसद दे दौनें सदनं गी कल तक्कर स्थगित करी दिता गेआ। विपक्ष नै केंद्री गृह मंत्री अमित शाह उप्पर अम्बेडकर हुंदा अपमान करने दा दोष लाया ते उंदे कोलां माफी मंगने दी मंग कीती। लोकसभा च जिसले सदन दी कार्रवाई शुरू होई, उसलै अमित शाह हुंदे कल राज्यसभा च दिते गेदे भाषण लेई कांग्रेस, डीएमके ते खब्बे धड़े दी पार्टियें नारेबाजी शुरू करी दिती। संसदी मामलें दे राज्यमंत्री अर्जुन राम मेघवाल ते होरनें सदस्यें विपक्ष दे इस रौले दी निंदा कीती।

<><><><><><>

PM-Ambedkar

प्रधानमंत्री नरेंद्र मोदी होरें डॉ. भीम राव अम्बेडकर हुंदे पर केंद्री गृह मंत्री हुंदी टिप्पणी गी लेइए कांग्रेस दे आरोपें पर पलटवार कीता। उनें आरोप लाया जे शाह हुंदे आसेआ पेश तथ्यें थ्वां कांग्रेस साफतौरा पर तिलमिलाई दी ऐ। अपने केई सारे स्नेह च मोदी होरें आखेआ जे अमित शाह होरें भारतीय संविधान दे निर्माता दा अपमान करने दे काले इतिहास गी उजागर कीता ऐ। उनें डॉ. अम्बेडकर हुंदा सम्मान नेई करी पाने च नाकाम रौहने दा बी कांग्रेस पर दोष लाया। उनें आखेआ जे कांग्रेस अम्बेडकर होरें गी 2 बारी चुनाएं च हराने, उनेंगी भारत रत्न थ्वां वंचित करने लेई बी जिम्मेदार ऐ। उनें आखेआ जे डॉ. अम्बेडकर हुंदे प्रति उंदी सरकार दा पूरा सम्मान ते श्रद्धा ऐ। प्रधानमंत्री होरें जोर देइए आखेआ जे उंदी सरकार नै अम्बेडकर हुंदी विरासत, उंदे विचारें गी बनाई रखने लेई कम्म कीता ऐ जेदे च हाशिए पर रौहने आहले समुदायें दा जीवन स्तर बेहतर करना ते उंदे लेई कल्याणकारी प्रोग्राम शामिल न। उनें आखेआ जे उंदी सरकार डॉ. अम्बेडकर हुंदी इज्जत करदी ऐ।

<><><><><><>

NSA-China

राष्ट्रीय सुरक्षा सलाहकार अजीत डोबाल होरें अज्ज बीजिंग चीन दे विदेश मंत्री वांग यी दे दक्खी मुद्दे उपपर गल्लबात कीती। इस गल्लबात च असल कब्जा रेखा पर शांति बनाए रखने ते दक्खी सरबंधें दी बहाली शामिल ऐ। दौनें मुखें दे बश्कार पूर्व लद्दाख च सैन्य गतिरोध दे कारण 4 साल शा दक्खी सरबंधें च बित्थ बधी गेदी ही। डोबाल हुंदे नेतृत्व च भारतीय प्रतिनिधिमंडल, विशेष प्रतिनिधियें दी वार्ता दे 23में दौर च हिस्सा लैने आस्तै कल बीजिंग पुज्जे। एह वार्ता 5 बरें दे लम्में बक्फे बाद शुरू होई। चीन नै वार्ता दे बारे च मेद जतांदे होई आखेआ जे ओहू रूस च ब्रिक्स सम्मेलन दौरान प्रधानमंत्री नरेंद्र मोदी ते चीन दे राष्ट्रपति शी जिनपिंग हुंदे बश्कार बैठक च बनी दी आपसी समझ दे आधार उपपर प्रतिबद्धताएं गी लागू करने आस्तै भारत कन्नै कम्म करने लेई तैयार ऐ।

<><><><><><>

Yuva Sangam IIM

एक भारत श्रेष्ठ भारत कार्यक्रम दे तैहत आई.आई.एम जम्मू नै जम्मू थमां चेन्नई लेई युवा संगम यात्रा उपपर 25 विद्यार्थियों दे समूह गी खाना कीता। इस पैहलकदमी दा मकसद सांस्कृतिक आदान-प्रदान, राष्ट्र एकता ते नेतृत्व विकास गी बढ़ावा देना ऐ। इस यात्रा कन्नै विद्यार्थियों गी बक्ख-बक्ख संस्कृति गी दिखने ते उंदे बारै जानने ते राष्ट्रीय एकता ते अखंडता गी मजबूत करने च जोगदान देने दा मौका थोगा।

<><><><><><>

RDD

खुराक, नागरिक आपूर्ति ते उपभोक्ता मामलें दे मंत्री सतीश शर्मा होरें इब बैठक दौरान छम्ब च जारी विकास कम्में दी ठोस ते माली प्रगति दा जायजा लैता। इनें कम्में गी ग्रामीण विकास मैहकमें दी बक्ख-बक्ख स्कीम तैहत तोड़ चाढ़ेआ जा'रदा ऐ। इस बैठक दा मुख मकसद बक्ख-बक्ख प्रोजेक्टें, जेदे च मनरेगा, प्रधानमंत्री आवास योजना, ग्रामीण कैपेक्स ते ग्रामीण साफ सफाई सरबन्धी प्रोजेक्ट शामिल हे। मंत्री होरें पारदर्शिता, जवाबदेई पर जोर पाया। उनें अधिकारिण पर इस गल्ला लेई जोर पाया जे ओहू बकाया पेदे कम्में गी पूरा करन ते टैंडर प्रक्रिया गी तेज करन तां जे परियोजना 2024-25 बरे च पूरा कीता जाई सकै। विकास मैहकमे दे अधिकारी बी शामिल हे।

<><><><><><>

DC-Doda Traffic

डोडा कस्बे च ट्रैफिक दी बढ़ती समस्या गी दिखदे होई डोडा दे डिप्टी कमिशनर हरविंद सिंह होरें उत्थुआं दा दौरा लाया। इस दौरान उंदे कन्नै वरिष्ठ अधिकारी बी मौजूद हे। उनें ट्रैफिक प्रबंधन दा जायजा लैता। डिप्टी कमिशनर होरें ट्रैफिक प्रबंधन ते उनें थाहरें जित्थे गड्डियें दा मता रश हुंदा ऐ, उत्थुआं दा जायजा लैता। उनें मुतलका टीमें गी हिदायत कीती जे ओहू ट्रैफिक नियमें दी सख्ती नै पालमा करन ते शिड़कें पर कीते गेदे गैर कनूनी कब्जे गी हटान तां जे ट्रैफिक सुचारू बनी सकै। उनें आम लोकें च जागरूकता फैलाने पर बी जोर पाया। एहदे अलावा डिप्टी कमिशनर होरें घोषणा कीती जे निजी कंपनिण डोडा च कचरे दा प्रबंधन करोग, उत्थे इक संयंत्रण लाया जाग जित्थे कचरे गी होरनें चीजें च तब्दील कीता जाग।

<><><><><><>

Animal Husbandry Javed Dar

राई-उत्पादन ते ग्रामीण विकास मंत्री जावेद अहमद डार होरें अज्ज सिविल सचिवालय च पशु पालन ते भिड्डु पालन मैहकमें लेई इक व्यापक बजट बैठक दी अध्यक्षता कीती। इस बैठक च मैहकमे दे कम्मकाज दी समीक्षा उप्पर जोर दित्ता गेआ जेदे च कम्मं दा समेंसिर होना ते करसानें दी भलाई-बेहतरी लेई बक्ख-बक्ख योजनाएं दा आंकलन करना शामिल हा। मंत्री होरें विभागें दे प्रधानें गी निर्देश दित्ते जे ओहू तालमेल च सुधार, चुनौतियें कन्नै निब्बड़ने ते योजनाएं गी लागू करने च पारदर्शिता गी यकीनी बनाना।

<><><><><><>

Kathua Fire

कठुआ दे शिवनगर च अग्गजनी दी इक घटना च इक परिवार दे 6 जनें दी मौत होई गई। मने आहलें च 4 बच्चे, इक रिटायर्ड डीएसपी ते उंदी इक धीऽ शामिल ऐ। 4 होर लोक इस घटना करी घायल होई गे'न। अग्ग लगने दी एहू घटना जंदी रातीं 1 बजे होई। मकामी लोकें अग्ग साहलने दी कोश्ट कीती ते घायलें गी तौले अस्पताल पजाया। केंद्री मंत्री जतिंद्र सिंह होरें कठुआ दे शिवनगर च होई दी इस घटना उप्पर बसोस प्रगट कीता ऐ। अपने इक सोशल मीडिया पोस्ट च मंत्री होरें आखेआ जे जे इक परोआर दे 6 सदस्यें दी इस घटना च मौत दी खबर कन्नै बड़ा दुख होआ ऐ। परमात्मा उंदे परोआर गी इस दुख गी सैहन करने दी शक्ति देऐ। उपराज्यपाल मनोज सिन्हा होरें बी अपने सोशल मीडिया पोस्ट च इस अग्गजनी दी घटना उप्पर डूंगा बसोस जाहिर कीता ऐ।

<><><><><><>

Forest-Fire Poonch

पुंछ जिले दी कुल्लियं, के.जी सलोत्री ते करमारा सैक्टर आहले जंगलें च अग्ग लगने दी घटना पेश आई ऐ। अग्ग दिएं घटनाएं दी इक मुख्क वजह खुशक मौसम बी ऐ। पुंछ दे डीएफओ नवीद अहमद होरें आखेआ जे हाल दे मौसम करी 40 हैक्टर थ्वां बद्द इलाका इस अग्ग करी प्रभावित होई। अग्ग स्थालने आस्तै अमले गी कम्मै पर लाया गेआ। पुंछ दे मतेम सारे इलाकें च अग्गा पर काबू पाई लेता गेआ ऐ। जंगलात अफसर, मकामी लोक, सेना नै बी एहदे च सहयोग कीता।

<><><><><><>

Autumn Fest Kishtwar

कल शुरू होने आहले Autumn Festival ते कवि सम्मेलन दी तैयारियां पूरी होई गेइयां न। मशहूर गायक चमन लैहरी होर किशतवाड़ दी ऐतिहासिक चौगान मैदान च 19 दिसंबर 2024 गी अपनी गायकी राहें इस Autumn Festival गी चार चन्न लाडन। इस आयोजन दा मकसद सांस्कृति गी बढ़ावा देना ते केंद्र ते केंद्र शासित प्रदेश आसेआ चलाई गेदी स्कीमें बारे जागरूकता करना बी ऐ। विद्यार्थिंएं लेई इक कार्यक्रम दा आयोजन बी कीता जाग जेदे च उनेंगी प्रदेश दे कालजें ते यूनिवर्सिटीज़ च खाली पेदे ओहदें बारै जानकारी दिती जाग। एहदे शा पैहले किशतवाड़ दे डी.सी राजेश कुमार श्रवन होरें तैयारियें दा जायजा लैता ते इस आयोजन कन्नै जुड़े दे मैहकमें गी इसगी सफल बनाने लेई निर्देश दित्ते।

<><><><><><>

Farmers-Udhampur

उधमपुर पच्छिम थमां विधायक पवन कुमार गुप्ता होरें मुख राई-बाई सरबंधी अफसर उधमपुर ते होरनें दुए अमले नै बक्ख-बक्ख इलाकें दे 40 करसानें दे इक समूह गी दो रोजा जागरूकता कार्यक्रम राई-बाई दे पूरे-पराते विकास सरबंधी कार्यक्रम हेठ समर्थ निर्माण प्रोग्राम तैहत होआ ऐ। एहदा मकसद करसानें गी नमीं तकनीकें बारै जागरूक करना ऐ तां जे ओहू अपने झाड़ गी होर बेहतर करी सकन। इस कार्यक्रम दा मकसद करसानें दी आमदन गी दूना करना ऐ।

<><><><><><>

Sports

शतरंज च भारत दे प्रणव वेंकटेश ने स्लोवेनिया च फिडे विश्व अंडर 18 यूथ रैपिड ते ब्लिट्ज़ खिताब जित्ति ऐ इतिहास रची दित्ता ऐ। चेन्नई दे रौहने आहले ते भारतीय ग्रैंड मास्ट होरें रैपिड श्रेणी च 9 अशारिया 5 अंक हासिल करिए सुन्ने दा तगमा जित्तेआ। प्रणव नै ब्लिट्ज़ श्रेणी च इक राउंड रौहंदे 19 अशारिया 5 अंक हासिल कीते। ब्रिस्बन च बार्डर गावस्कर ट्राफी क्रिकेट प्रतियोगिता दा त्रिया टैस्ट मैच बरखा करी ड्रॉ होई गेआ। खेड्डु रोके जाने तगर भारत नै अपनी दुई पारी च बिजन विकेट गवाए दे 8 रन्ज बनाई लैते दे हे। एहदे थ्वां पैहले दिन आस्ट्रेलिया दे 445 रन दे परते च भारत अपनी पैहली पारी च 260 रनें पर ऑलआउट होई गेआ हा।

<><><><><><>

Weather

जम्मू-कश्मीर च सीत जारी ऐ। हर जंदे दिन कन्नै ठंड बदा रदी ऐ। जम्मू खित्ते च घट्टोघट्ट तापमान 8 अशारिया 1 डिग्री सैल्यिस दर्ज कीता गेआ। जिसलै के अज्ज दे दिनें दा बहोबद् तापमान 19 अशारिया 3 डिग्री सैल्यिस दर्ज कीता गेआ ऐ। मौसम विभाग नै इस म्हीने दी 20 तरीक तगर आमतौर पर मौसम दे खुश्क रौहने दी पेशगाई कीती ऐ।

<><><><><><>